

KOMMUNE KUJALLEQ



TAPIISARNERMUT MALERUAGASSAT

2022

Kapitali 1

Tapiissuteqarnissamut piumasaqaatit

§ 1. Tunngaviusumik piumasaqaatit

- Kommune Kujallermiit pingaartinneqarpoq, aaqqissuussat tapiiffigineqartut innuttaasunut pissuserissaarnermik ataqpeqatigiinermillu takutitsissasut.
- Kommunemit tapiissutit suliniutinut innuttaasunik immikkoortitsisunut atorneqassanngillat.
- Peqatigiiffiit, timersoqatigiiffiit kiisalu inuit ataasiakkaat kulturikkut assigisaannullu suliniutillit, tapiissutiniq qinnuteqarsinnaapput.
- Qinnuteqaatit tamarmik tamatigut immikkut naliliiffigineqartassapput.

§ 2. Inatsisit tunngavigineqartut

- Kulturikkut ingerlatsineq sunngiffimmilu sammisassaqaartitsineq pillugit Inatsisartut inatsisaat nr. 5, 6. juni 2016-imeersoq
- Timersorneq timigissarnerlu pillugit Inatsisartut inatsisaat nr. 15, 6. juni 2016-imeersoq

§ 3. Peqatigiiffiit tapiissutiniq tunineqarnissaannut piumasaqaatit

Imm.1: Peqatigiiffiit qinnuteqartut Kulturikkut ingerlatsineq sunngiffimmilu sammisassaqaartitsineq pillugit Inatsisartut inatsisaat nr. 5, 6. juni 2016-imeersumi, imaluunniit Timersorneq timigissarnerlu pillugit Inatsisartut inatsisaat nr. 15, 6. juni 2016-imeersumi siunertaasut eqquutsissavaat.

Imm.2: Peqatigiiffiit qinnuteqartut CVR-normoqassapput.

Imm.3: Peqatigiiffiit pilersitsinertalimmik ataatsimeersuarsimassapput, ileqqoreqqusanillu peqatigiiffiup siulersuisuinut paasissutissanik imaqaartunik Inersaannermut Ingerlatsivimmut tunniussisimassallutik.

Imm.4: Peqatigiiffiit ukiumumoortumik aningaasaqarnikkut naatsorsuutiniq Inerisaannermut Ingerlatsivimmut tunniussisimassapput, ataani piumasaqaatinik eqquutsitsisunik:

- Ukiumoortumik naatsorsuutit peqatigiiffimmi ilaasortat amerlasusaannik, ilaasortanillu akiliutaannik paasissutissanik imaqassaaq.
- Ukiumoortumik naatsorsuutit kingusinnerpaamik 1. Maj tunniunneqassapput, ataatsimeersuarnermilu peqatigiiffiup kukkundersiuisumit nammineq toqqagaanit naatsorsuutit akuerineqarsimassapput.

Imm.5: Peqatigiiffik ingerlataminut atatillugu, meeqqanut 15-nit inorlugit ukiulinnut toqqaannartumik attaveqartussamik suliakkiissatillugu, peqatigiiffik pineqartunut, meeqqanik pinerlussimannginnermut uppersaatinik aallersimassapput.

Imm.6: Politikikkut kiisalu upperisarsiornikkut suliniaqatigiiffiit, imminnut tunngasunik aaqqissuiniartut tapiiffigineqarsinnaangillat.

§ 4. Qinnuteqaammut piumasaqaatit

Imm.1: Tapiissutininik qinnuteqaatit kingusinnerpaamik qaammat ataaseq sioqqullugu nassiunneqassapput Inersaannermut Ingerlatitsivimmut suliareqqinneqarnissaa eqqarsaatigalugu.

Imm.2: Qinnuteqartut tamarmik tamatigut aningaasartuutissanut missingersuummik tunniussisassapput, qinnuteqaammullu immersugassaq Kommune Kujalleq nittartagaaniittoq immersorlugu.

Imm.3: Qinnuteqaatinut angalanissamut attuumassutilinnut, angalanissamut pilersaarut, paasisissutissallu attuumassuteqarsinnaasut allat ilanngunneqassapput.

Imm.4: Tassanngaannartumik pisoqartillugu, kingusinnerpaamik qinnuteqarfissaq angumerineqanngitsoorneranik kinguneqartumik, tapiissuteqartoqarsinnaavoq.

§ 5. Tapiissutininut atuisimanermut takussutissat

Imm.1: Tapiiffigineqartut tamarmik pisussaaffigaat, aaqqissuussap naammassereernerata kingorna, qaammat ataaseq qaangiutsinnagu nalunaarummik, tapiissutit siunertamut atorneqarsimanerannik takussutissartalimmik allakkatigut tunniussissallutit

Imm.2: Suliniutit aaqqissuussinerillu tapiiffigineqartut piviusunngunngitsuusagaluarpata, tapiissutigineqartut millinerneqaratik utertinneqartassapput, taamaasiortoqanngippallu tulliani qinnuteqarnermi tapiissuteqartoqarnissaa naatsorsuutigineqassanngilaq.

Imm.3: Peqatigiiffinnut kiisalu inunnut ataasiakkaanut tapiisoqarsimatillugu, tapiiffigineqartumut akisussaasoq tapiissutigineqartut pillugit Akileraartarnermut aqutsisoqarfinnuk nalunaaruteqassalluni pisussaataitaavoq.

Kapitali 2

Siunertat tapiiffigineqarsinnaasut

- § 6. Angalanerit
- § 7. Pikkorissarnerit
- § 8. Timersornermi sungiusaasuunerit
- § 9. Illunik/inimik attartornerit
- § 10. Kulturimik sunngiffimmilu sammisassanik aaqqissuussinerit
- § 11. Suliniaqatigiiffiit

§ 6. Angalanerit tapiiffigineqarsinnaasut

Imm.1: Campus Kujallermi ilinniartut paasisassarsiorlutik angalanerinit, Kommune Kujallermi najugaqalinnut, ilinniartumut ataatsimut kr. 2.000 tapiissutigineqarsinnaapput.

Imm.2: Aliikkusersuisartut nipilersortartullu Kommune Kujallermut angalanerinut. Innuttaasunut aaqqissuussanut atatillugu nipilersortartunik, erinarsoqatigiinnik kiisalu inunnik ataasiakkaanik kulturimut tunngasunik sulialinnut qaaqqusinermi tapiissuteqartoqarsinnaavoq. Kommune Kujallermi nipilersortartut, erinarsoqatigiit, eqqumiitsuliortut inuillu ataatsiakkaat kulturimut tunngasunik suliallit, illoqarfinnut allanut angalaneri tapiiffigineqarsinnaapput.

§ 7. Pikkorissarnerit tapiiffigineqarsinnaasut

Imm.1: Pikkorissaasunik tikisitsinerit.

Imm.2: Timersornermik sungiusaasut pikkorissariarneri.

§ 8. Ilinniariarluni angalanerit tapiiffigineqarsinnaasut

Imm.1: Nunanut allanut ilinniariat, soorlu: AFS kr. 10.000,- tapiiffigineqarsinnaapput. Højskoleriartut kr. 5.000,- tapiiffigineqarsinnaapput.

Imm.2: Ilinniariarnartumut piffissamik sivikitsumik oqaatsinik pikkorissariat kr. 5.000,- taperneqarsinnaapput.

§ 9. Timersornermi sungiusaasuunerit tapiiffigineqarsinnaasut

Imm.1: Meeqqanik (U-18) sungiusaasoqartitsinerit tapiissuteqarfigineqarsinnaapput.

- Piumasaqaatit: Sungiusaasutut ingerlatsisimanermut takussutissiisinnaaneq, soorlu timersortarfimmi attartornermut upparnaasaat.

Imm.2: Sungiusaasunut pikkorissaasumik /-nik tikisitsinerit.

Imm.3: Timersoqatigiiffinnit aaqqissuisoqartillugu, soorlu fodboldskole, håndboldskole assigisaallu, meeqqanut inuusuttuaqqanullu sammisut, atortussarsiniarnerinni tapiisoqarsinnaavoq.

Imm.4: Nuna tamakkerlugu pissartanngorniuttoqalertillugu assigisaanilu, sungiusaasoqartitsinermusiassat (instruktørløn) qinnutigineqarsinnaapput.

§ 10. Illunik/ininik attartornerit tapiiffigineqarsinnaasut

Imm.1: Peqatigiiffinnik assigisaanilluunniit, tamanut ammasumik aaqqissuusanut imigassartaqanngitsunik ingerlatisoqartillugu illumik/inimik attartornemut 100% tikillugu tapiisoqarsinnaavoq.

Imm.2: Peqatigiiffiit illuutaannut ininulluunniit ataavartumik attartugaannut ingerlatsinermut aningaasartuutitut tapiissuteqartoqarsinnaavoq, ukiumut annerpaamik kr. 5.000,-

§ 11. Kulturimik sunngiffimmilu sammisassanik aaqqissuussinerit tapiiffigineqarsinnaasut

- Kalaalerpaluttut assassugaanik sulialinnut
- Kalaallit nerisassiaanik nutarterinermik sulialinnut
- Oqalugartitsinerit (qaammarsaanernut sammisut assigisaallu)
- Isiginnaartitsisartut
- Kulturikkut attuumassuteqartunik siunertalinnik sulialinnut

§ 12. Suliniaqatigiiffiit tapiiffigineqarsinnaasut

Imm.1: Suliniaqatigiit tamanut ammasumik aaqqissuussinerannut tapiissuteqartoqarsinnaavoq.

Imm.2: Suliniaqatigiiffiit politikkimut upperisarsioqatigiiffinnullu attuumassutillit, imminnut tunngasunik aaqqissuussiniartut tapiiffigineqarsinnaanngillat.

Kapitali 3

Timersornermik ingerlatalinnut tapiissutit

§ 12. Timersortartunut tapiissutit

§ 13. Timersortartunut tapiissutininik annertussusiliinerit

§ 14. Timersortarfinnut attartornerit

§ 13. Timersortartunut tapiissutit

Imm.1: Timersoqatigiiffinnut tamanut sammisunut

Imm.2: Anngunniunnerit kiisalu nuna tamakkerlugu pissartanngorniunnerit.

Imm.3: Kujataani timersuutininik pissartanngorneriunnerit, inoqarfiillu akornanni unammiaarnerit

Imm.4: Timersullammanngortitsinerit, kajumissaasiinerit assigisaallu.

Imm.5: Timersortarfinnut timersorfinnullu assigisaannut attartornerit.

Imm.6: Nuna tamakkerlugu unammisartut (landshold) Kommune Kujallermi najugallit, Nunani Avannarlerni, Europami nunarsuarlu tamakkerlugu pissartanngorniutivinnerni peqataasussat tapiiffigineqarsinnaapput. Tapiissutit sumiiffigisami pisariaqartitanut matussusiissapput, allatigullu nunanut allanut unammisartunut tapiiffigineqarsinnaanikkut periarfissaqassanatik, GIF, Specialforbund, Elite Sport Greenland assigisaaluunniit aqutigalugit.

§ 14. Timersortartunut tapiissutininik annertussusiliinerit

Imm.1: Timersoqatigiiffiit pissartanngorniunnernut peqataasut angalanerannut tapiissuteqartoqartassaaq:

1. U-18 angalanermut aningaasaartuutit 65%-ii, nerisaqarnermut ullormut inummut ataatsimut 250 kr.
2. 18+ ukiullit inersimasut angalaneranut aningaasartuutit 50%-ii

Imm.2: Timersullammaat allallu:

1. Timersullammak inummut ataatsimut tunniunneqarpat: kr. 1.000-nik kajumissaaserneqassaaq
2. Timersullammak inummut ataatsimut tunngatinneqarani timersoqatigiiffimmut tunniunneqarpat: kr. 5.000-nik kajumissaaserneqassapput.
3. Neriunaatilimmut (talent) kajumissaasiineq: kr. 500,-
4. Sungiusaasutsialak: kr. 1.000,-

Imm.3: Kommune Kujallermi pissartanngorniunnernut atatillugu pokalinut tapiisoqarsinnaavoq.

§ 15. Timersortarfinnik attartonerit

1. U-18 timersortarfimmik attartornermi 100%-mik tapiissoqartassaaq.
2. Inersimasunut attartortunut tapiissut 85%-mik tapiissoqartassaaq.

Tapiisarnermut maleruagassat Kulturimut Sunngiffimmullu Ataatsimiitsitaliamit akuerineqarput ulloq 29. December 2021

Kim Ezekiassen
Ataatsimiitsitaliap siulittaasua

Tapiisarnermut maleruagassat Kommunalbesyrelsemit akuerineqarput ulloq XX.XXXX 2022

Stine Egede
Borgmesteri